


Terap cinta keamanan dan benci penganasan dalam kurikulum pendidikan



HARGAI SINGAPURA: Seorang anak pelarian dari Syria menulis di sekeping nota atas usaha yang dijalankan oleh SimplyIslam membantu warga Syria yang berada di sempadan Turkey. - Foto-foto SIMPLYISLAM

1/2

5 Nov 2014

NIZAM ISMAIL

ANJURAN kepada cintakan keamanan dan membenci penganasan bakal diterapkan dalam kurikulum Pendidikan Keamanan yang dibangunkan bersama oleh SimplyIslam dan badan Islam yang lain.

Pusat pendidikan SimplyIslam dengan kerjasama Jamiyah membentuk sebuah kurikulum kemahiran agar pelajar dapat menghayati maksud keamanan, seterusnya tidak memilih jalan pintas atau berpihak kepada keganasan.

Menyedari peri penting mengukuhkan kefahaman mengenai keamanan, SimplyIslam telah pun menyelitkan pendidikan mengimbangi kelakuan yang baik di dalam kehidupan harian dan juga ketika melungsur Internet.

"Kami ingin mendidik masyarakat melalui pelajar mengenai kepentingan menolak pelampau bagi memastikan keamanan tercapai," ujar Pengarah Urusannya, Encik Mohamed Nassir Abdul Sukkur.

Menurutnya, melalui kelas-kelas minggunya, tenaga pengajar memberikan panduan kepada pelajar tentang sikap melampau, keganasan dan radikalisme.

"Kita seharusnya mencontohi cara dan kehidupan Nabi Muhammad saw dan bukan melihat cara militan IS yang memotong kepala orang sebagai panduan hidup ini," ujar Encik Mohamed Nassir.

SimplyIslam kini mempunyai sekitar 500 pelajar madrasah mingguan.

Tenaga pengajar SimplyIslam juga telah dilatih membantu menjelaskan tentang penganasan atau militan IS atau penganas Al-Qaeda.

SimplyIslam berharap ia membina jati diri dan kemampuan pelajar mengamalkan strategi dan prinsip antikeganasan di dalam kehidupan harian.

Menurut Encik Mohamed Nassir, SimplyIslam juga turut aktif menganjurkan syarahan bagi tujuan tersebut.

Bulan depan, SimplyIslam akan membawa pendakwah dari California, Amerika Syarikat, Ustaz Usama Canon, memberikan ceramah di sini.

Ustaz Usama telah memeluk Islam pada 1996 dan adalah tokoh yang telah banyak menjelajahi seluruh dunia dalam menyampaikan mesej dan memperkenalkan imej kesederhanaan yang terdapat dalam ajaran Islam.

Encik Mohamed Nassir berharap dengan usaha ini, masyarakat berupaya mengekang potensi keburukan dan kerosakan yang boleh dicetuskan fahaman militan IS.

Bagi mendekati pelajar memahami angkara perbuatan IS ini, SimplyIslam baru-baru ini juga telah membawa lapan pelajar politeknik dan lapan relawan ke sempadan Syria-Turkey di Kilis, Turkey, untuk melihat sendiri pelarian Syria di sana.

Selain itu, pihaknya juga merancang membawa 12 pelajar Universiti Nasional Singapura (NUS) dan Universiti Teknologi Nanyang (NTU) melihat kehidupan pelarian Syria di Turkey pada bulan depan.

SimplyIslam turut terlibat dalam kempen Bantuan bagi Pelarian Syria di Turkey (Asrit) yang dijalankan dengan Rangkaian Ekspatriat Muslim AMP (MEX).

"Menyampaikan bantuan kemanusiaan adalah satu lagi cara tindak balas kami. Kami akan terus bekerjasama dengan masyarakat antarabangsa untuk memberi bantuan kemanusiaan kepada orang awam yang tidak berdosa di Iraq dan Syria yang terpaksa menjadi pelarian disebabkan tindakan penganas kejam ini," ujarinya.

Pada akhirnya, keganasan adalah musuh kemanusiaan yang wajib dibendung dan dihapuskan.

Militan IS telah mewujudkan ketidakstabilan terhadap keamanan dan keselamatan di Timur Tengah dan mempunyai potensi membawa ideologi kebencian di negara di rantau ini, ujar Encik Mohamed Nassir.

"Sebagai masyarakat Islam aman yang cintakan keamanan dan mengamalkan kesederhanaan, kami tidak menyokong sebarang tindakan ganas dan ekstremis oleh mana-mana pihak. IS merupakan satu ancaman serius kepada masyarakat dan semua," ujarinya lagi.